

Kerbred 2008

Vum zwatte Stock in de Zimmerner Gemoa,
begrüß ich Eich ob groß orrer kloa.
Von Süden von Osten von West und von Nord,
alles is unterwegs gonz Zimmern is fort.
Vun de Neibagebiete von Schlaggehause un vun de Bech do unne,
all hebt Ehr heit wirrer de Weg hergefunde,
Stehjt mit Eierne Familie orrer mit Eierm Schatz,
vor die Kerbred bereit om roure Platz.
Ewwer jetzt bevors lousgehjt wie alle Joahr,
stelle mer uns erst mol vor.

Kerbmädsche (Katharina Fröhlich):

Ich will Eich unsern Mundschenk vorstelle dodefer werds Zeit,
de Julian Osinski stehjt vor Eich ehr Leit,
er muß joa Mundschenk soi, des is doch klor,
weil soin Unkel de Jurek vor 25 Joahr a oaner wor.

Mundschenk (Julian Osinski):

Un ich soue Eich jetzt gebt all emol acht,
wer de Kerbvadder vun Zimmern iss 2008.
De Steffen Selmes soin Vadder haast Kalli des sog ich gonz frei,
un is a bei de Silwerne des Joahr debei.

Un ich heb die Ehre, des is joa gewiss,
un gewwe bekannt wer es Kerbmädsche is.
Die Katharina Fröhlich kerberprobt des kann jeder lese,
weil Ehrn Oba de Karl-Horst un a Ehrn Unkel de Stefan sinn schon Kerbvadder
gewese.

Bevor ich jetzt oufoange zu berichte
aus de akutelle Zimmerner Ortsgeschichte,
will ichs groad emol ausprobiern,
un moine Oma Elvira zum Geburtstoag gratulieren.
Wonn ich schon de Kerbvadder bin,
do is des bestimmt heit doch emol drinn.

Ewwer jetzt genug gebabbelt ehr lieve Leit,
jetzt werd's endlich vor de Kerbspruch Zeit.
Ewwer vorher singe mer all noch laut und froh.
Des Lied „Die Zimmerner Kerb is do“.

Mundschenk: Die Zimmerner Kerb, die läwe ...

Kerbvadder: Es Kerbmädsche, des läwe ...

Kerbmädche: De Kerbvadder, der läwe ...

In Zimmern gibt's en Stammtisch, der haaßt Roter Hahn,
un die wollte a emol uffen Mehrtagesausflug foahrn.
Jeder Stammtisch orrer Joahrgoang, so is des schon Brauch bei uns im Ort,
macht joa immer e paar Doag long fort.
Des kenne mer a, hewwe sich die Männer do geschworn,
mer wern a emol e Woch zu eme Ausflug foahrn.
Un wie se sou he un her iwwerlegt,
wohin die Reise donn om beste gehjt,
do hewwe se for sich sou festgestellt,
Zimmern is doch de schenste Platz uff dere Welt.
Also sinn se nit in die Ferne marschieret,
sondern hewwe sich in de Goldene Mitte oiquartiert.
Der Wirt vun dem Hotel is a on dem Stammtisch debei,
un hat prompt a noch e paar Stuwwe frei.
Sie hewwe alle Doag noch em Friehtick wos unnernumme,
un owends immer wirrer schej hoamgefunne.
Sie worn im Zoo, uffem Otzberg, es sinn joa noch Fitte,
oan Doag hots gewwe en Spaziergoang in die grüne Mitte.
De Wirt vum Cafe Gemies wor a debei,
< un hat for den Ausflug extra e paar Doag frei,
uns soi Vertretung im Cafe wie soll ich des nenne,
hot gemoant, der hot ruhig emol e Koarte schreiwe kenne.
Un wonn mer des hejert brauch mer gor nit zu lache,
mer muss aus allem nor des Beste mache.

Kapell speel e Lied, weil mer des muss,
un zwar vom "Kli-kla-klawitter-Bus".

Kerbvadder: Es Kerbmädche des läwe ...

Kerbmädche: De Kerbvadder er läwe ...

Mundschenk: Die Kerbborschte läwe ...

Bei uns im Ort gibt's en Frisör, der dut a singe,
un monchmol durrer joa die dollste bringe.
Sou horrer wie de katholisch Kerchturm wor oigerist,
weil der Sturm Cyrill do durchgefegt ist.
Dem Polier vun dere Firma die dort hot geschafft,
die Hoarn geschnere mit all soiner Kraft.
Ewwer nit im Salon, des wer joa nix for die Kerbred gewese,

noa uff moim Bloaad do konns ichs do lese,
die sinn de Kirchturm uff e un in lufitger Höhe,
konn mer den Frisör die Hoarn schneire sehje.
De Fotograf vum Echo wor a mit debei,
un hot alles fotografiert gonz frei.
Im Echo wor a e Bild, hot man mir erzählt,
ewwer im Zimmerner Blädche hot des Foto gefehlt.
Die katholisch Kerch het des Foto nit gewollt un dut sich drum kimmern,
das koa Bild is im Informationsblatt vun Zimmern.
Dodebei wer des doch e Foto wert gewese,
wonn kon mer im Blädche sou wos schejnes schun lese.

Un dodezu speelt die Kapell dem Frisör soin Hit,
"Ich schneide Euch die Haare" und alles singt mit.

Kerbmädche: De Mundschenk er läwe ...
Mundschenk: Es Kerbmädche läwe ...

Zimmerner Kerb, die is bekannt,
in jedem Ort in jedem Land,
wos die Zimmerner dodefer mache,
sinn schon als emol die dollste Sache.
Sou wor e Familie in Ägypten zu eme Geburtstag gewese,
un die Geschichte, die jetzt kimmt konn mer in de Chronik lese.
Zum fuffzigste Geburtstoag ins Beduienenzelt,
reist die Familie um die halbe Welt.
Un uff dem Geburtstag, hewwe se en Ufftritt gemacht,
do is des Beduinezelt beinoh ausennannergekracht.
Sie hewwe dem Gebortstoagskind e Kerbred gehoale,
un die Nationalhymne vun Zimmern gesunge, des konn koaner bezoahle.
Die gonz Familie hat die Kerbkluft ou,
un hot donn am Schluß die Hinkel ennegedou.
Sou isses richtig, auch im fernen Land,
werd dodurch unser Kerb bekannt.
Alle Beduine singe kräftig mit,
ewwer zum Schluß fällt mer e, des is doch de Hit,
eigentlich wor des mit de Kerb nit gonz klor,
weil es Gebortstogagskind vun Dieborsch wor.
Ewwer sou doun a die Diebojer die Nationalhymne singe,
Kapell dou uns dodezu emol es "Kerblied" bringe.

Kerbvadder: De Zimmerner Kerb, die läwe ...

Kerbmädche: Die Kerbborschte läwe ...

Mallorca hot en König, England hot e Queen,
mer in Zimmern hewwe en Prinz, mirreme richtige Spleen.

A souen Prinz brauch joa schließlich Ausweispapiern,
ewwer do dut der nit oafach uff die Gemoa marschiern.

Noa do werd draus gemoacht e Riesenschau,
des muss schoinst sou soi, des sieht mer genau.

Mit zwaa Limusine un zwaa Mäntel aus Hermelin,
sieht mer den Prinz mit soim Bruder ins Gleckelche ziehn.

Dort hot es Fernseh schon gewart,
un a de Bojermoaster wor extra dort he gestart.

Normale Zimmner krieje en Ausweis im Bürgerbüro,
ewwer bei Adlige lääft des oannerst, des is halt emol so.

Wie der Prinz soin Ausweis hat, horrer en Empfang gegeben,
moin lieber Moann do konnste wos erleben,
zwaa Mitglieder vum Zimmerner Kerbverein,
die lädt der zum Empfang als Statiste ein.

Esse un Trinke wor glaab ich frei,
un die Statiste worn die gonz Zeit vorne debei.

Un die Kapell speelt dodezu,
des Lied vum "Money", des is de Clou.

Mundschenk: De Kerbvadder, der läwe ...

Kerbmädche: Die Zimmerner Kerb die läwe ...

Unsern Joahrgoang is des erste der humorvoll bleibt,
un sich selbst in die eigen Kerbred schreibt.

Donn mer hewwe ebbes gebroacht, des is zum lache,
do muss ich en Vers oufach driwwer mache.

Unsern Kerbboam wollte mer hoale bei Newwel un Reje,
do hewwe mer oinschoinend all nit richtig gesehje.

Unsern Bulldogfoahrer, der wor falsch abgeboue,
un sou konn ich Eich soue, es is nit geloue,

hat uff de oanner Seite noch en Baum geleje,
es hot oig gedratscht es wor en furchtbare Reje.

Alle Spezialiste hewwe gesoat, der Boam is richtig,
mer wollte a ausem Woald raus, des wor uns gonz wichtig.

Do hewwe mer den Baum zum Bach ause geschlaaft,
un uns erst emol e richtig Friehstick kaaft.

Fix und fertig hann mer uns beim Bach getroffe,

un erst emol richtig oaner gesoffe.
Zwaa Doag späerer dut mer uns doun soue
Mer henn de verkehrte Boam hoamgetroue.
Also bei Noacht un Newwel wirrer in de Woald,
es Werrer wor nit besser, es wor gonz schej koald.
Un jetzt mim richtige Boam uff de Hoamweg gemacht,
ehr liewe Zimmerner es wär doch gelacht.
Sou hewwe mer zwaa Kerbbeem, des muss koan Fehler soi,
donna gorad bei eme rout weiße Joahrgoang fellet mer do oi,
wonn ebbes bassiert, do sinn mer gerist,
weil so en Ersatzkerbbaum goar koan Fehler ist.

Un for jed Mädche und jeden Borscht,
singe mer vun de "Kimmelswiese un dem dicke Schorsch".

Kerbvadder: De Mundschenk er läwe ...

Mundschenk: De Kerbvadder er läwe ...

Kerbmädche: Die Kerbborschte läwe ...

Un jetzt ehr liewe Leit bericht ich noch mej,
vun ere Geschichte die is werklisch oig schej.
E paar Männer vun Zimmern die doun gern schwitze,
un wöchentlich minoanner in de Sauna sitze.
Un hot oaner Geburtstoag do gibt der oan aus,
sou wos a vergonge in dere Sauna in de Waldstroße draus.
Wie se hoam wollte hot der oa groad obgewunke,
sie hann alle drei e bissje veel getrunke.
Do segt der Moann ich rufe moi Fraa,
die helt uns all ob, des is doch klar.
Er hot ougerufe un die Fraa is kumme,
un hotse all im Auto uffgenomme.
Sie sinn zurickgefoahrn ewwer om Sportplatz wor erst emol Schluß,
weil die Fraa ehr Auto dort ouhoale muss,
die Polizei hot se mit de Kelle erausgewunke,
des hot dere Fraa bestimmt gestunke.
Un die drei Saunagänger worn alle drei nit ougeschnallt,
do hot des mim Bußgeld onz schej ennegeknallt.
Jeder 40 Euro wos soll mer dodefo hoale,
misse die drei Männer do bezoahle.
For des Geld wern se locker mim Taxi gestart,
un henn noch en Haufe iwwerisch gehatt.

Un die Kapell macht uns Zimmerner jetzt den Spaß,
un speelt des Lied „Ich geb Gas“.

Mundschenk: Es Kerbmädsche läwe ...

Kerbvadder: Die Zimmerer Kerb läwe ...

Kerbmädche: De Mundschenk läwe ...

Silwerne Kerbborschte des is kloar,
denne ehr Kerb wor vor 25 Joahr.
Un das mer des feiert, wisst ehr all schon,
des hot bei uns in Zimmern Tradition.
Bei soueme Fest, des kann mer begreife,
gibt's e nei Kappe, e nei Hemb un a e nei Schleife.
Sou wor des a bei de Silwerne 2007,
denne is joa gornix onneres iwwerisch gebliwwe.
Do hewwe se sich owends all minoanner getroffe,
die neije Klaarer verdaalt und natierlich a oaner gesoffe.
Un dem oane Silwerne duts onschoinend noch nit loange,
er is noch ause ins Key West oan trinke goange.
Om nächste Mittag isser uffgewacht nit wie nei geborn,
un denkt, jesses noa ich heb joa all moi Klaarer verlorn.
Soi gonz silwern Kerbkluft horrer nit mej gefunne,
Kappe, Hemb, Schleife, es wor alles verschwunne.
Un gonz schnell dut er do kapiern,
du werst dich bei doim Joahrgoang gonz scheij blamiern.
Ewwer wies sou gehjt, der gute Moann hat Glick,
un kriegt sojn Krempel wirrer zurick.
Die Bäckersfraa hats beim Weckausfoahrn gesehje,
weil, die Dutte hot Mitte uff de Stroaße geleje.
Die Fraa iss ausem Auto, guckt in die Dutte enne,
un kann sofort mit Adlerblick erkenne,
des kenne nor die Klaarer vun eneme silwerne Kerbborscht soi,
un trägt die Dutte ins Key West enoi.
Sou finne die Silwerne Klamotte zu dem Besitzer zurück,
do hat der Kerbborscht doch werklich Glück.

Un die Kapell, speelt, des fällt mer groad ein,
"Es ist so schön es ist so fein".

Kerbmädche: De Joahrgoang 88/89 er läwe ...

Mundschenk: De Kerbvadder läwe ...

Gemischtes stehjt uff moim Zettel jetzt zum Schluss,
Sache, die mer oafach soue muss.
Als erstes de Mark Faig, do muss ich en Nome nenne,
dut mer als neje Spieler vun de 98er kenne.
Der hot des in Ebay ersteigert wie nett,
un mit de Bayern den Darmstädter Verein gerett.
Er hott e Trikot vum Schweinsteiger kriegt,
un wor for Fraat fast wie verrickt.

Donn unsern Bojermeister uff den kann mer nur proste,
der hot jetzt en Haufe oannern Poste,
Er ist nit nur Mediziner in Kranichstein,
noa noch en oannern Job fällt mer do ein:
Er is a Sänger beim FFH,
un ehr Leit Bier oustecke kann er dank Plastikhoawe a.

Kerbmädsche: De Bojermeister, der läwe ...

Un iwver unsern Kreisel heb ich mer a moi Gedanke gemacht,
letzt heb ich wos gesehje ich het beinoh gelacht.
Do fähjert die Kistenwache in dem Kreisel erimm,
do is ebbes bassiert Gott sei Dank wors joa nit schlimm,
die zwaa hann sich uffenoanner verlosse,
un die Klappe om Lieferauto hinne nit verschlosse.
Un im Kreisel duts uff oamol gonz laut knalle,
un es gonze Leergut is vum Auto runnergefalle,
Ewver die zwaa doun sich iwverhaupt nit beschwern,
un mim Besem vun de Reunigung de Kreisel kehren.

Ewver de schenst Akt wor joa in de Reinheimer Straße draus,
beim ECO, wou se oabgerisse hewwe e Haus.
Die kloa Hall hot unner Denkmalschutz gestoanne,
ewver owends im siwwe hot der Bagger ougefoange,
un hot doch wirklich gonz aus Versehje,
die denkmalgeschützte Halle nit gesehje.
Er is dewerrer gerennt und hot se imgeworfe,
des hot die Leit vun Zimmern hart getroffe.
Werrim macht mer souwoas owends, a des liegt uff de Hand,
do wird die Sach nit sou im Ort bekannt.
Un die Strof, die des Kost, des waas jedes Kind,
for sou e Firma doch nur Peanuts sind.

Donn will ich moi Aufmerksamkeit mol in unser Nochberort lehje,
do is ebbes bassiert, des hot noch koaner gesehje.
Mitte im Summer hewwe die en Fastnachtsumzug gestart,
also dodruff hot bestimmt jeder gewart.
Die Diebojer Fastnacht gebts schon seit 500 Johr,
un deshalb om Schloßgoartefest en Fastnachtsumzug wor.
Ehr liewe Diebojer do muss ich jetzt berichte,
vun unserer Zimmerner Kerbgeschichte.
Donn unsern Ortshistoriker hot festgestellt,
die Zimmerner Kerb gib'ts schon iwwer 700 Joahr uff dere Welt.
Un deshalb ehr Diebojer wie kennts oannerst soi,
die Kerb in Zimmern hault ehr mit de Fastnacht nit oi.

Zum Schluss muss ich werklich noch ebbes erwähne,
oald und jung feiert in Zimmern des is doch des schöne,
de ältst Teilnehmer wor 88 on der Kerb-Vorparty im Mai,
un hot mitgefeiert in de allererst Reih.

Iwwerhaupt sollt mer sich on Kerb verdroue,
des muss ich vun do huwwe heit emol soue,
vorsjoahr wors doch werklich nit mej schej,
die hewwe sich gehaa des gib'ts gor nit mej.

Es will mer absolut nit in de Kopp,
wer on Kerb haagt un nit feiert is doch bekloppt.
Hoffentlich sinn die desjoahr dehoam geblewe,
ich hebs extra in die Kerbred enne geschrewe.

Mundschenk: Die Zimmerner Kerb, die läwe ...

Jetzt bin ich fertig wos soll ich noch bringe,
ewwer bevor mer jetzt die Nationalhymne singe,
muss ich soue, bleibt mit Eierm Schatz,
vor de Mehrzweckhall uffem roure Platz,
mer doun desjoahr nit in die Mehrzweckhall gehj,
macht all mit, es Programm werd oig schej.

Un jetzt die Henn uffs Herz, des is links denkt all drou,
Thomas stimm die "Nationalhymne" ou.